

## **Sächs chöme dür die ganzi Wält** (4/2004)

© 2003, Text/Musik: Roland Zoss, Arr. Stefan W. Müller

Erschienen bei Sound Service. Instrumentiert im Folk/Country-Stil.  
aus der CD «Liedermärli 2» erschienen bei Sound Service.

Infos: [www.rolandzoss.com](http://www.rolandzoss.com)

### **Musical-Figuren/Singstimmen:**

0) Erzähler **1) Der Soldat 2) Der Starke 3) Der Schütze 4) Der Bläser 5) Der Läuffer 6) Der mit der schrägen Kappe 7) Der König**

Ab 2. Refrain kommt immer eine Stimme dazu, bis es sechs sind.

### **Musikalischer Ablauf**

**(musikalische Teile = alphabetisch nummeriert):**

- Erzählintro
- A) Strophe: D-G-D-A--D-G-D-A-D
- B) • Refrain: hm-A-D-A-D
- C) Bridge: G-D-f#m-A-G-D-A-A7
- Erzählextro

#### **• Intro, Erzähler:**

Es isch e mal e Maa gsy, dä het mängi Kunscht verstande. Er het chönne springe wie nes, Reh, brüele wie ne Löi u mit em Schwärt dryschlaa, dass 's het gchuttet wie lätz und em Sterchste ds Härz isch i d Hosen gheit.

Wo das em Chünig sy General vernoht het, het er dä Maa zue sech pfiffe u het gseit: Los i stelle di a als Soldat.

Vo denn aa isch dä überall, wo Chrieg isch gsy für e Chünig ga dryschlaa. U der Chünig het däm tapfere Soldat derfür mänge Batze versproche.

Aber einisch isch der Chrieg fortig gsy. U de het me däm Mann drü Fränkli Sold i d Hang drückt u gseit: **«Merci no, dass bisch cho Chriege für üs - u jitze chumm guet hei!»**

Der Soldat het ghüstlet: «Höh!», isch da gstände wie ne gkläpfte Aff. U won er sech nach em ne Zytli wieder chly gspürt het, seit er:

**«Was, nume drü Frankli, derfür dass i chuum z Ässe u z Trinke ha bercho, jede Tag ha gkämpft bis zum Umgheie, u derby es paar mal fasch mis Läbe hätt müesse la!»**

**Nenei, das han i nid verdient! Potzdonner-Kanonerohr-abenang! Jitz isch aber gnue Heu dunger! Eso behandlet me ne rächtige Schwyzer nid! Dä Chünig soll mir all syni Schätz gäh, aber chly dalli! U wen er nid wott - de gahn i mer ga hole, was mer zuesteit!»**

A) Musik-Intro:

1+1 git 2 + 1 git 3 + 1 git 4 + 1 git 5 + 1 git Sächs!

1A) `S het einisch eine gseit  
wo hei isch cho vom Chrieg:  
**«So zwöi, drü Fränkli Lohn isch nüüt  
wen i mys Läbe gieb!»**

**2A) Das macht mi fasch chly toube  
der Liebgott sölls vergäh  
jitz gahn i was i z guet ha  
mer sälber ga näh!»**

### 3A & 4A) **Musik-Intermezzo**

5A) Da chunnt er där ne Wald  
gseht eine wo dert schafft  
wo Böim usschrysst wie Gjätt  
mit syre Riisechraft

6A) Dä tischet doch füf Bueche  
e Tanne obedruuf  
u treit alls ohni z flueche  
hei der Stutz düruuf

**B) •Da seit er zu däm Maa: Wei mir nid zämehaa?  
So zwe wie mir, die chömedür die ganzi Wält  
zwe wie mir, die chömedür die ganzi Wält!**

#### **1. Stimme: der Soldat**

7A) Wo sie chly ggange sy  
lygt eine uf em Buuch  
dä zylet mit em Gwehr  
zum Miststock näbem Huus

8A) De seit er: **«Lueget - Päng!»**  
u schiesst - es isch e Gruus  
der Flöige wo dert hocket  
z linggen Oug grad uus

**B) •Sie säge zu däm Maa: Wei mir nid zämehaa?  
so drei wie mir, die chömedür die ganzi Wält!  
drei wie mir...**

#### **1. Der Soldat 2. Der Starke**

9A) Am Wägrand uf em Boum  
da hocket eine da  
u blaset us em Naseloch  
dass meinsch e Föhn tüeg gah

10A) Vo Holland bis Paris  
lütte all Glogge Sturm  
und d Güggel uf de Chilchetürm  
dräijt's zringsetum

**B) •Sie säge zu däm Maa: Wei mir nid zämehaa?  
so vier wie mir, die chöme dür die ganzi Wält!  
vier wie mir...**

**1. Der Soldat 2. Der Starke 3. Der Schütze**

11A) U nach es paarne Stund  
steit eine a der Strass  
numen uf eim Bei  
ds andre lygt im Gras

12A) Dä seit: «**Was gits da z gaffe?  
I bi ne Supermaa  
uf zwöi Bei no viel schnäller  
als e Vogel flüüge cha!**»

**B) •Sie säge zu däm Maa: Wei mir nid zämehaa?  
so füüf wie mir, die chöme dür die ganzi Wält!  
füüf wie mir...**

**1. Der Soldat 2. Der Starke 3. Der Schütze 4. Der Bläser**

13A) 'S chunnt eine wo sy Chappe  
schreg uf em Poli treit  
die Füüf chöi nümm vor Lache  
dä Tscholi aber seit:

14A) «**I bi nid schüüch no blöd  
doch wenn i d Chappe dräije  
de wird es chalt wie gstört  
u rägnet gfrorni Chräije!**»

**B) •Sie säge zu däm Maa:: Wei mir nid zämehaa  
so sächs wie mir, die chöme dür die ganzi Wält  
sächs wie mir, die chöme dür die ganzi Wält**

**1. Der Soldat 2. Der Starke 3. Der Schütze 4. Der Bläser 5. Der  
Läuffer**

(Bridge von 15-18:)

15C) U grad zu dere Zyt  
da gyt der Chünig aa  
dä Maa, wo schneller springi  
als sy Tochter, chönn se ha

16C) Doch syg er hingerdry  
oder bring ke Wassertropf  
vom Brunne zrügg i ds Ziel,  
de verlüüri er sy Chopf

17C & 18C) gesprochen:

Die Sächs wo grad ir Stadt si gsy, ghöre das. U der Löiffer seit zu den  
andere füüf: «**Manne, so ne Glägeheit sötte mer üs nid la entgah!**  
**Es wär ja glachet, wenn i nes Renne gäge ne verwöhnti**  
**Chünigstochter nid würdi gwinne!»**

**(Min. 4'23)**

19A) Der Läuffer wytt vorus  
nimmt uf me Stei e Pfuus  
u ds Chünigs-Chind nid schüüch  
läärt ihm ds Wasser uus

20A) Der Jeger wos het gseht  
schiesst ds Stei-Chüssi furt  
der Läuffer springt uf, füllt der Chrueg  
u gwinnt im Spurt

**B) •Da jubile die sächs Mää, wüll mir hei zämegha  
gwinne mir das Chünigs-Chind u viel, viel Gäld!  
Da jubile die sächs Maa, wüll mir hei zämegha  
gwinne mir das Chünigs-Chind u viel, viel Gäld!**

**1) Der Soldat 2) Der Starke 3) Der Schütze 4) Der Bläser 5) Der  
Läuffer 6) Der mit der schrägen Kappe**

21A) Der Chünig dä wird bitter  
er hett e schlimme Plan  
i re Stube mit Gitter  
ladt er zum Hochzytsmahl

22A) Die Stube, die wird bschlosse  
e Choch dä füüret y  
bis die Sächs, wo drinn ässe  
söll verbrate sy

23A) Nach es paar Stunde füüre  
wo me die Tür ufmacht  
gseht me Füüf, wo früüre  
dä mit der Chappe lacht

24A) Jitz wirds em Chünig gschmuech  
er seit mit em ne Fluech:

«**Näht Gäld was EINE trage cha  
doch d Tochter löht mer da!**»

**B) •Da jubile die sächs Maa: wüll mir hei zämegha  
gwinne mir statt ds Chünigs-Chind jitz viel, viel Gäld!  
Da jubile die sächs Maa: wüll mir hei zämegha  
gwinne mir statt ds Chünigs-Chind jitz viel, viel Gäld!**  
**1) Der Soldat 2) Der Starke 3) Der Schütze 4) Der Bläser 5) Der  
Läuffer 6) Der mit der schrägen Kappe**

25A & 26A) erzählt:

*Jitz pfiffe die Sächs alli Schnyder im Land zäme. U lö sech vo dene vierzäh Tag lang e Riisemega-Mordssack la näije. Eine, wo em Chünig syni Schätz schön dry möge. Ds Gäldseckli passt em gröscht vo de Sächs grad e so gäbig uf d Achsle!*

27A) Der starch Maa dä leit los  
dä wo gärn Böim usuruft  
sächstuusig Chäre Guld  
het er i ds Seckli gstopft

28A) Der Chünig, dä wird toube  
`s treit eine - s isch nid z gloube  
alles Gäld zum Land z düruus  
da schickt er d Rytter uus

29A) Doch dä wo heiss cha blaase  
drückt eis Loch zue vor Nase  
u blaset d Rytter samt de Ross  
em Chünig zrügg vor ds Schloss

30A) Jitz git der Chünig na  
u seit zum General:  
«**Löht mer die Sächs la gah  
die sin üs äuä z schlau!**»

**B) •Da jubile die sächs Maa: wüll mir hei zämegha  
göh mer jitze hei u teile ds ganze Gäld!  
Da jubile die sächs Maa: wüll mir hei zämegha  
göh mer jitze hei u teile ds ganze Gäld,  
göh mer jitze hei u teile ds ganze Gäld!**  
**1) Der Soldat 2) Der Starke 3) Der Schütze 4) Der Bläser 5) Der  
Läuffer 6) Der mit der schrägen Kappe**

•**Erzähler-Schluss:**

U de hei sie gfyret u gjützet. Si desume tanzet u hei vor luter Lache i d Hose byslet. Vom Chünig, vo däm het nie me nüüt ghört!

Aber me seit, dass i wüeschte Nächt – we ne strube Sturm über ds Land chutti – mes mängisch ghöri wieheren i der Luft. U de suuse eim uf zmal statt Hagelhörner ganzi Schwärter um d Ohre.

Und uf ere Kanonechugle obe gsei me ne General cho z flüge i syre verhützte Uniform!

Aber das alls isch üsne Sächs glych gsy! Sie hei gfyret u trunke wie d Führwehr a der Fasnacht. U vor luter Tuurten-Ässe si sie gar nümm zum Schlafe cho.

Sächs Tag und sächs Nächt lang isch das eso wytterggange!

U we sie nid gstorbe si, oder vor lutter Ässe us de Hose platzet, de ghört me se no hüt fyre u singe!

Äbä u so isch es de cho, dass dä wo so cha blase där ds Loch vo syre Nase de Ching a der Chilbi macht d Windredli z dräije.

U er, wo alls cha mache z gfrüüre, wenn er d Chappe grad uf em Poli treit: er chüelt i de heisse Sümmere de Lütt i der Badi d Yscreme.

Der superstarch Maa, der Supermaa: er isch für die Schwache da. Er rysst zum Byspiel die schwache, chranke Böim ir Stadt us - u pflanzet se duss am Waldrand wieder y.

Dä wo cha zyle u schiesse wie ne Wältmeister, päng!: er verchouft de Lütt am Kiosk für ne Füüfliber vo syre Preichi.

U der schnäll Löifer vertreit d Expressbriefe so ungloublech tifig, dass sie aachöme, scho bevor me se abgschickt hett!

Eine ellei gloubts nid! Aber äbe, hie si's Sächs wo zäme häbe. U wo Sächs zäme hei, erreicht me mängs im Läbe! Nid nume im Märli...

Schluss